



Om Blitsposte ontvang, stuur 'n e-pos na bladuitleg@nhk.co.za of grafies@nhk.co.za en versoek dat u naam op die versendingslys geplaas word.

Nuus, berigte en kort kommentaar (uiters 100 woorde) aan produksie@nhk.co.za

Webblad van die Hervormde Kerk www.nhka.org

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

Wees kerk waar jy ook al gaan!

Ek onthou hoe ek as kleuter raas gekry het in kwaai ds Breedt se kerk as ek my diere in die soogdiergids van die Krugerwildtuin te hard benoem het. Ek het grootgeword in die kerk. Vir my oupa was die Hervormde Kerk en sy rugbyspan dié twee onderwerpe waарoor jy nie eens probeer onderhandel het nie.

So het ek opgegroei in die kerk. Bybelstudiegroepe by die huis. Jeugkampe. Heerlike vakansies saam met ons predikantskinders-maatjies. Die kerk was vir my 'n tuiste. 'n Troos in slegte tye.

Toe verloop die lewe ook so dat ek met 'n predikant trou ... nie oor die kerk nie, maar oor hy my sielsmaat was. Watter voorreg was dit vir my om saam met hom vir die kerk te werk. My kinders het tussen vleiskratte en onder vergaderingtafels grootgeword.

Dit was goeie tye in die kerk. Die gemeentes was groot en sterk. Die NHSV het gebлом. Die kerk was geseënd.

Toe my man besluit om die bediening te verlaat, het ek gevoel of 'n stukkie van my bestaan weggeruk is. Dit het lank geneem om weer 'n plekkie te kry om in te pas.

Stadig maar seker het ek besef ek hoef nie 'n predikantsvrou te wees om te werk in die kerk nie. Dit was 'n ander lekkerte om te werk en te dien sonder om verantwoordelik te wees vir al die reëlings en beplanning. Ek was 'n gelukkige lidmaat wat met liefde gewerk het in die kerk en ook in die wêreld daar buite. Ek glo ek het 'n verskil gemaak.

My man was 'n dominee sonder gemeente, aangesien hy voltyds gewerk het in die privaatsektor. Hy het dikwels gespot dat hy sy brood aan albei kante gebotter gehad het. In die week het hy met passie sy dagtaak vervul, en Sondae kon hy steeds sy groot vreugde uitleef om te preek. Soms het ek saamgery, soms verskonings uitgedink, maar op die ou einde het my liefde vir die kerk en haar werk geseëvier.

In ons bediening was klein gemeentetjies nog altyd ons witbroodjies. Daardie mense gee sonder voorbehoud en besef elkeen moet bydra om die toekoms van die gemeente te verseker. So het ons toe ook die voorreg gehad om vir die laaste jaar en 'n half in so 'n spesiale klein gemeente te kon dien. Juweelmense met harte van goud. Ons het met hart en siel ons liefde vir die kerk uitgeleef. Die lewe het ons goed behandel en God se seën was sigbaar in elke projek.

Tot een verskriklikeoggend. Daar het ek my beste vriend, die pa van my kinders en my sielsgenoot binne sekondes verloor. My hart was in stukke. Dieselfde oomblik het ek ook my gemeente verloor. My veilige vesting. My plek van aanbidding. Die kerk waar my kinders tuis was.

Op die pilaar van NG Gemeente Noord in Polokwane staan die woorde: *Die kerk verlaat nou die terrein.* Dit raak my elke keer aan as ek uitry by daardie hek.

Nou is dit vir my 'n troos... Ek is lief vir die kerk en gaan kerk wees waar ek ook al gaan.

**Gretha van Staden
Sekretaris: NHSV Noord-Transvaalstreek**


(Ds Antonie van Staden is Dinsdagoggend 20 Augustus vanjaar tuis na 'n hartaanval oorlede.)

Lief en leed

- **Ds Theuns Snyman** (emeritus, 82) ontvang sedert Woensdag 13 September chemoterapie en bestraling vir sy maagkanker. Hierdie behandeling sal vyf weke lank duur. Ons bid hom die Heer se onderskraging toe.

- **Die volgende predikante verjaar tot 29 September, en word hartlik geluk gewens:**

- Vrydag 22 September: Di ZC (Zet) Robberts (70) (emeritus/Villiers) en E (Errol) Sheppard (63) (Rietspruit/Vanderbijlpark)
- Saterdag 23 September: Dr GJ (Gert) Malan (63) (Mosselbaai) en ds DW (Wouter) Beukes (62) (emeritus)
- Sondag 24 September: Dr JM (Thinus) van Staden (47) (Montana)
- Dinsdag 26 September: Ds MJ (Marna) van der Westhuizen (48) (beroepafwagtend)
- Donderdag 28 September: Prof IWC (Natie) van Wyk (70) (emeritus)
- Vrydag 29 September: Ds BM (Buddie) Dupper (70) (emeritus/Pongola)



Ds Theuns Snyman



Ds Lorret de Leeuw



Dr Martin Jansen van Rensburg

- Enige saak wat volgens die Kerkorde onder die aandag van die **Moderamen** gebring moet word, moet mev Karen Breedt (karen@nhk.co.za) asseblief **teen 2 Oktober** bereik **vir 13 Oktober** se Moderamenvergadering. **Geen laat sake** sal in die agenda opgeneem word nie.
- **Ds LJ (Lorret) de Leeuw** van Breyten (benoeming) het 'n beroep ontvang na Carolina (deeltyds).
- **Dr MJ (Martin) Jansen van Rensburg** van Delmas het die beroep na Lichtenburg bedank.

- Die **SP Engelbrecht-museum** nooi jóú uit vir 'n besoek. Dis 'n lekker uitstappie vir kategesegroepe, belydenisklasse, NHSV groepe, senior lidmate, gesinne, nie-Hervormers ook, en enige ander belangstellendes. Moedig asseblief mense aan om die Museum te besoek. Bring eetgoed en kom hou piekniek. Hier kan jy voorwerpe sien uit die geskiedenis van ons Kerk en van ons kermense. R40 per persoon sluit 'n ou wêreld oop. Bespreek vooraf by Carel Johann de Bruin, by 082 733 3951. [Die Museum is afhanglik van besoekersinkomste en donasies – skenkings of erflatings. Donasies is aftrekbaar van belasting. Gemeentes, ringe, lidmate, help ons asseblief.]

Elektroniese betalings

Rekeningnaam: Kerkgeld vir Kerkwerk

ABSA takkode: 632005

Tjekrekeningnommer: 020149752

Verwysing: 2468 2533K + Naam

Stuur asseblief bewys van betaling na careljohann@gmail.com

- **Tweede werkruimte vir Gemeente Gaborone.** Gemeente Gaborone ontvang graag aansoeke vir 'n **tweede volsorgwerkruimte**. 'n Suksesvolle kandidaat bedien die Afrikaans- en Engelssprekende gemeente van ongeveer 120 gesinne, asook die breër gemeenskap. Die dinamiese en diverse werkende gemeente is saamgestel uit uitgewekenes en permanente burgers, met lidmate wat afkomstig is van verskillende denominasies. Van aansoekers sal vereis word om 'n uitgesproke volgeling van Jesus te wees; te beskik oor voltooide opleiding aan 'n tersiêre instansie; bereid te wees om te verhuis na Botswana; en 'n dinamiese, roepingsbewuste, nie-diskriminerende en bevoegde prediker en evangelis te wees. Die twee werkruimtes dien parallel saam in die gemeente volgens gawes en pligstaat, soos uiteengesit deur die geloofleiers en die gemeente. Vergoeding is op 'n volsorgbasis wat behuising, medies, motortoelaag, pensioen, selfoon en kontantdeel insluit. Aansoeke aan Miranda de Wet (mi@dwdrilling.com) **sluit op 26 September 2023** en moet vergesel wees van 'n verkorte CV wat die kontakbesonderhede van twee referente insluit. Die suksesvolle kandidaat se permitproses om in Botswana te kan woon en werk, begin onmiddellik nadat die beroep aanvaar is.

**SP Engelbrecht
Museum**
Kerk- en kulturmuseum
NHKA
NEDERDUTSCH HERVORMDE KERK VAN AFRIKA

Prof SP Engelbrecht
TERUG IN TYD

- **Werkruimte: Samewerkende Gemeentes Boksburg en Witfield.** Aansoeke word ingewag van gelegitimeerde predikante van die NHKA om hierdie bedieningsruimte te vul. Die samewerkende gemeentes is Boksburg en Witfield aan die Oos-Rand, twee stadsgemeentes in die ring van Germiston. Boksburg het 'n sieletal van ongeveer 205, en Witfield 'n sieletal van ongeveer 78 wat meestal uit bejaarde lidmate bestaan. Die gemeentes se kerkgeboue is sowat 10 km uitmekaar en daar word elke Sondag op albei plekke 'n erediens gehou.

Aard en omvang: Van die predikant sal verwag word om die normale aktiwiteite van die gemeentes, soos prediking, kategese, spesiale eredienste en fondsinsamelings, te organiseer en te faciliteer. Kontak met die lidmate, siekebesoek en huisbesoek is baie belangrik, en pligte soos in die Kerkorde moet uitgevoer word. Albei kerkrade verwag van die predikant om goed gefundeerde preke wat motiverend en leersaam is, aan te bied. Die predikant sal in albei gemeentes bevestig word.

Vergoeding: Die predikant sal aangestel word volgens kontrak vir 'n aanvanklike periode van 12 maande en sal vergoed word deur 'n enkele kontantbedrag wat R32 000 per maand sal beloop.

Aansoeke: Aansoeke **sluit op 15 Oktober 2023** en moet vergesel wees van 'n verkorte CV wat die kontakbesonderhede van twee referente insluit. Aansoeke word gestuur aan **beide** administratiewe beampies van die gemeentes: Anneli Louw (nhkwitfield@gmail.com) en Bernadene du Preez (nhkaboksburg@gmail.com).

Diensaanvaarding: So spoedig moontlik, maar onderhandelbaar. Die kerkrade behou die reg voor om die lys van kandidate na die sluitingsdatum te verklein of te vergroot en mag self ander kandidate nader. Indien nodig, sal die pos weer geadverteer word. Vir enige navrae, kontak Anneli Louw (084 627 7253) of Bernadene du Preez (079 883 8741).

- **Werkruimte vir voltydse bediening: Gemeente Alberton.** Aansoeke word ingewag van gelegitimeerde predikante van die NHKA om die werkruimte te vul ná die emeritaat-aanvaarding van die huidige predikant op 29 Februarie 2024.

Gemeente: Die gemeente dink met 'n kopspiritualiteit oor kerkwees, maar funksioneer in hulself met 'n hartspiritualiteit. Die gemeente is gereed vir groei en sal veral wil fokus op die herontdekking van hul roeping. Die gemeente wil deur die liefde van God dien en meelew tot sy eer.

Die gemeente is 77 jaar oud. Die gemiddelde ouderdom van die gemeente se 289 belydende lidmate en 43 dooplidmate is 52 jaar. Dit is 'n pastorale gemeente in die hartjie van Alberton.

Die gemeente se kerkgebou is in Alberton (Tweedelaan 82). Daar is geen pastorie beskikbaar nie. Die suksesvolle kandidaat sal vir eie verblyf verantwoordelik wees. Die lidmate woon in en om die dorp. Kontak met die lidmate en huisbesoek is baie belangrik.

Die gemeente kan die predikant tans vergoed met 'n totale pakket van vyfhonderd duisend rand per jaar. Enige predikant met meer diensjare, wat vir dié versorging kan begin werk, is welkom om aansoek te doen.

Leraarsprofiel: Die leraar moet lief wees vir die Here en sy kudde. Die Hervormde identiteit en etos is vir die gemeente belangrik.

Aansoeke sluit op 22 Oktober 2023. Aansoeke moet vergesel wees van 'n CV en 'n kort verslag van die kandidaat se VBO-krediete. Met ontvangs van die CV sal 'n vraelys aan u gestuur word. Die vraelys moet eerlik en sorgvuldig ingevul word. Dit moet per e-pos gestuur word aan die skryba (Cobus van Wyk) by alberton@nhk.co.za. Enige ander navrae kan skriftelik aan dieselfde adres gerig word. Alle aansoeke word vertroulik hanteer. Die kerkrade is nie verplig om een van die aansoekers te beroep nie.

- **Werkruimte vir deeltydse bediening: Gemeentes Otjiwarongo/Outjo-kombinasie.** Die kombinasie Otjiwarongo/Outjo in Namibië beskik oor 'n vakante werkruimte vir 'n deeltydse predikant. Unieke wetlike voorskrifte oor werkpermitte deur die Namibiese regering beperk die opsies wat die gemeentes kan uitoefen vir die bediening. In die lig daarvan is die ideale kandidaat vir die deeltydse pos 'n geëmeriteerde predikant in die ouderdomsgroep 65 tot 68 jaar wat nog die energie en inisiatief het vir gemeentewerk vir 'n periode van twee tot vyf jaar. Die kombinasie sal aansoek doen vir 'n tydelike werkpermit vir twee jaar, wat herhaal sal word indien die persoon vir langer kan of wil bly. Die vergoedingspakket sluit in: 'n gemeubileerde pastorie in Otjiwarongo; 'n gemeentemotor plus brandstof; en 'n kontantvergoeding per maand. Skakel ds Barrie Oberholzer by +264811487465 vir verdere inligting en administratiewe reëlings soos vir 'n mediese fonds.
- **Gemeente Hartebeeshoek** nooi almal wat die afgelope 40 jaar betrokke was by die gemeente na hul feesgeleenthed om hul **40ste verjaardag** te vier.

Saterdag 28 Oktober: Basaar vanaf 09:00
Sondag 29 Oktober: Erediens 09:00, met Massanagmaal,
 groeteboodskappe en loofferete

Bevestig teenwoordigheid teen 20 Oktober

Hans van der Merwe 071 331 2428
 Lukas Vorster 081 354 0777

Vergaderings

- Vrydag 22 September: Beleggingskomitee

'n Gedig

Dis dan wanneer

Wanneer ek met probleme worstel,
 wanneer my rede diep en ver moet soek
 voor ek 'n vaste antwoord vind;
 wanneer die regte woorde nie wil kom
 vir wat ek so korrek moet neerskryf nie;
 wanneer die vrae vrae bly
 en antwoorde my steeds ontwyk –
 dis dan wanneer ek terugleun in my stoel
 en my weer verfris
 deur net 'n oomblikkie aan jou te dink,
 weg van vrae en probleme en onsekerheid
 aan jou waar geen vertwyfeling is nie,
 net die vaste wete van ons liefde.

Herman FB Nel
 (Uit: *Onthou*, 1975)

Kerklike en ander publikasies

- Die **Kerkkalender vir 2024** wat die afdeling Kerklike Kommunikasie vir gebruik in ons gemeentes voorberei het, is nou **[hier](#)** op die Kerk se webblad beskikbaar. Teken asseblief aan om toegang tot die kalender te kry. Die kalender bevat inligting oor die kerklike feesdae, openbare vakansiedae, skooltermyne en spesiale geleenthede wat vir die hele Hervormde Kerk van belang is. Gemeentes kan hul eie gemeenteprogram daarop invul en die kalender in gedrukte formaat of elektronies onder hul lidmate versprei.



Bybelse Dagboek / Almanak 2024

R200 (versending uitgesluit)



Kry belangrike inligting oor die Hervormde Kerk en 'n inspirerende Bybelse dagboek in een omslag

Bestel by
boekwinkel@nhk.co.za

- Lees die agtste uitgawe van die **gratis aanlyn publikasie LALASINI** by <https://lalasini.co.za/om/#p=1>. In sy redaksionele berig skryf dr Piet van Staden (emeritus/Worcester) oor die energie wat ons kan put uit die ontwaking van die lenteseisoen. Lees ook oor Barberton, natuurtherapie, die Galápagos Argipel, selfsorg, die Eugène Marais Stigting, en vele meer. Vorige uitgawes kan hier gelees word: **LALASINI - Archive**.



Toerusting

- Ouderlinge kan gerus die **Hervormde Teologiese Kollege (HTK)** se **webtuiste** besoek. Gaan na <https://hervormdeteologie.co.za/ouderlinge/> vir inligting oor **gevorderde toerusting vir ouderlinge**. Tans verskyn daar reeds YouTube-skakels, PowerPoint-aanbiedings en Word-dokumente van Module I – *Die fasilitering van 'n erediens (ds Hannes van der Merwe)*; Module II – *Hoe berei predikante preke voor (dr Gerhard Nel)*; en Module III – *Die aanbied van 'n preek (prof Yolanda Dreyer)*. Prof Stephan de Beer se aanbieding van 29 Mei, *Hoe om jou gemeenskap beter te verstaan*, is ook daar beskikbaar. Laasgenoemde kan ook direk by <https://youtu.be/TnQNNDxzmP4> afgelaai word. Module II – *Die kuns van goeie gesprekvoering (dr Johan Bester)* is beskikbaar by <https://youtu.be/VfUgoBXodwA>, *Hoe om lidmate in tye van krisis te begelei (dr Annelie Botha)* by <https://youtu.be/dUJ9kXs4Tvw>, en *Siekebesoek en sterwensbegeleiding (dr Annelie Botha)* by <https://youtu.be/AcAQ3DrH7yw>.

Fondsin samelings

- Gemeente Hartebeeshoek: Outydse basaar**
Ons vier 40 jaar (1983-2023)
Saterdag 28 Oktober vanaf 09:00
Plantainlaan 55, The Orchards
Winskoopvleis en groenteverkope
Vir die smulpape: pannekoek, pap-en-kaiings, kerrie-en-rys, ens
Vir die pret: Skyfskiet, vlooimark, veiling, plaasdiere, ens
Vir meer inligting, kontak dr Cobus by 082 370 5038
- Alphonso Theron (61)** het besluit om twee monsters aan te durf. Hy wil die **Munga**, een van die heel moeilikste ultramaratons vir bergfietsie in die wêreld, voltooi – vir Rata en die kinders wat so dapper teen hul monsters stry! Die deelnemers moet meer as 1 100 km tussen Bloemfontein en Wellington binne 5 dae aflê. Om die monster van Rata se tekort aan inkomste te tem, wil Alphonso R1 000 000 insamel – 1 000 persone of instansies wat elk R1 000 skenk.

<https://rata.org.za/alphonso-se-monsteruitdaging/>

Elektroniese betalings

Rata Maatskaplike Dienste MSW
ABSA t杰krekeningnommer: 020 600 209
Takkode: 632005
Verwysing: MUNGA + Naam



- Daar is 'n **geleentheid vir 'n gemeente of individu** om by die **Centurion Boeremark op Saterdae** pannekoek en/of *jaffles* te verkoop. 'n Stalletjie kos R250 per Saterdag. Deposito R250 eenmalig en sertifikaat van Tshwane vir kosverkope eenmalig R920. Kontak Christo Potgieter by 072 737 3644.
- **Oornagfasiliteite: Seniordal.** Seniordal beskik oor oornagfasiliteite vir persone wat vergaderings of kongresse moet bywoon, of wat dokters moet besoek, of verblyf benodig vir familie van persone wat in die hospitaal is. Daar is veilige parkering en 24-uur-sekuriteit. **Vir navrae oor tariewe en vir besprekings**, kontak Salomie Stolz gedurende kantoorure 08:00-12:00 by 012 329 4318, of na ure by 083 308 0520.

Barmhartigheid

- **Poste beskikbaar by die Diakonale Pleegsorghuise Elsburg en Ninapark.** Die suksesvolle kandidate sal in elke geval optree as pleegouers vir ses seuns en verantwoordelik wees vir hul fisiese, emosionele en skolastiese hantering, met die ondersteuning van 'n multidissiplinêre span wat maatskaplike werkers insluit. Persone **tussen die ouderdomme van 30 en 55 jaar** kan aansoek doen (**verkieslik 'n getroude egpaar**). Persone van ander kerkgroepes met dieselfde Christelike grondslag as die NHKA kan aansoek doen, maar die suksesvolle kandidate sal vir die tydperk van hul aanstelling moet **inskakel by die betrokke NHKA-gemeente**. Benewens 'n maandelikse kontantvergoeding word gratis inwoning in die DPS-huis ook by die pakket ingesluit. Die geskikte kandidate moet bereid wees om psigometriese toetse te ondergaan. Met aanstelling sal hulle opleiding in ontwikkelingstrauma ontvang. **Die sluitingsdatums vir aansoeke is 31 Oktober 2023 (Elsburg) en 26 September 2023 vir Ninapark.** Kontak mnr Otto Viljoen by 079 495 2007 / 060 968 4907 / kinderhuise@nhk.co.za, of mev Suzanne van Deventer by 066 477 8904 / suzanne@rata.org.za. Besoek gerus ook die webtuiste www.pleegsorg.org.za of die Facebookblad DPS Huise.
- **Louis Trichardt-behuisingskompleks vir bejaardes** in Danville, Pretoria, bied kamers en giewe met twee etes per dag teen R3 850 per maand. Vir meer inligting, kontak mev Yvonne Willemse of matrone Jenny Wesson by 012 386 5310.
- **Ons Tuis (Andries Marié Oosthuizen) in Parys** het plek beskikbaar in die tehuisse vir versorging van verswakte bejaardes teen R9 760 per maand. 'n Volledige versorgingsfasiliteit sluit in 24-uur-versorging, drie maaltye per dag en sekuriteit. Behuisingsfasiliteite teen R5 990 per maand is ook beskikbaar op dieselfde perseel; dit sluit drie etes en weeklikse wasgoed en skoonmaak van kamers in asook gratis deelname aan sosiale programme. Vir meer besonderhede, skakel matrone Teresa Broodryk by 056 811 2185.
- **Seniordal-aftreeoord** is die eiendom van die NHKA se **Gemeente Pretoria** en spesialiseer in lewensregverkope en verhuring aan selfversorgende persone ouer as 55 jaar. Die oord is geleë in die veilige omgewing van Rietondale in Pretoria. Seniordal beskik oor 24-uur-veiligheidsdienste en toegangsbeheer, en bestaan uit die volgende woonstelle:

Enkelwoonstel (*bachelor*): R495 000

Eenslaapkamer: R515 000

1½-slaapkamer: R520 000

Tweeslaapkamer: R560 000

Tans is daar ook 'n enkelwoonstel (*bachelor*) te huur vanaf 1 Oktober 2023, teen R5300 per maand. Kontak Salomie Stolz by 012 329 4313 of 083 308 0520 (08:00-12:00) vir meer inligting.

- **Herfsakker Tehuis vir Bejaardes in Groblersdal:** Behuising beskikbaar vir persone ouer as 60. Geen versorging beskikbaar nie, persone moet selfversorgend wees. Geen etes word voorsien nie. Eie tuin. Tariewe is per vierkante meter en verskil van huis tot huis. Deposito van twee maande huur betaalbaar. Vir meer besonderhede, skakel Frik Rossouw by 082 830 6591.

- **Belfast Rusoord** bied onder meer 24-uur mediese versorging, CCTV, 24-uur-toegangsbeheer, drie gebalanseerde maaltye per dag, en aktiwiteite vir elkeen. Daar is fasiliteite vir semiversorging, verswakte bejaardes, en woonstelle vir selfversorging. Kontak Riana de Villiers by 013 253 31211 / 063 663 7449 / manager@belfastrusoord.co.za vir meer inligting en tariewe.
- **Athalia Uitreik in Bloemfontein** bied verblyf vir en versorging van bejaardes en persone met gestremdhede. Daar is enkel- en deelkamergeriewe in 'n huislike atmosfeer, verblyf met drie etes ingesluit, verblyf sonder versorging, en 24-uur-versorging. Navrae: 079 826 6363 / 084 023 0315 / 051 522 6089 / navrae@athalia.co.za / www.athalia.co.za.

Studentesake

- **Studentebehuising. Gemeente Stellenbosch** kan veilige behuising op die kerkterrein en op die kampus aan studente verskaf. Dit bestaan uit óf enkelkamers met gedeelde fasiliteite, óf eenmenswoonstelle. Skakel dr Chris le Roux by 079 495 3239 of stuur 'n e-pos na stellenbosch@nhk.co.za vir meer inligting.
- **Studentebehuising. Gemeente Philadelphia** verskaf aan studente veilige behuising by Fleur de Lis op die kerkterrein. Dit bestaan uit enkelkamers met gedeelde fasiliteite. Die behuising is binne stapafstand van die kampus en winkelsentrums. Skakel dr Sanrie de Beer by 083 226 1866 of stuur 'n e-pos na nhkphiladelphia@gmail.com vir meer inligting.

Betaalde advertensies in hierdie nuusbrief

Die koste van advertensies is **R250 per plasing (BTW ingesluit)**. Die verskuldigde bedrag moet uitgemaak word aan die Raad van Finansies, ABSA tjekrekening nommer 020-000-287, takkode 632-005, verwysing: u naam + Blitspos. Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal. Meer besonderhede oor advertensies kan aangevra word van produksie@nhk.co.za.

Oggendgebed

Hemelse Vader,
u getrouheid is duidelik elke dag wanneer die son verskyn.
Terwyl die son vandag oor ons opkom,
word ek herinner aan u genade en u versorging van die skepping.
Ek loof U, Here!
Help my om, met 'n dankbare hart,
u hand te sien oral in my lewe vandag.
Help my om U in al die besonderhede van my lewe te sien.
In Jesus se Naam.
Amen.

<https://raiseyourword.com/prayers-of-gratitude-in-the-bible/>

(Afrikaanse verwerking: Tessa Oppermann)